



partii naleraq

UPA 2017/167-01

15.05.2017

Suliniut MANU-p ineriartorteqqinneratut isigineqarsinnaasumik nuna tamakkerlugu angajoqqaanut atuarfimmik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Angajoqqaanut atuarfik aallartinneqassaaq 1. Juli 2018-imi.

(Inatsisartunut ilaasortaq Nivi Olsen, Demokraatit)

Suliniut MANU-p ineriartorteqqinneratut isigineqarsinnaasumik nuna tamakkerlugu angajoqqaanut atuarfimmik pilersitseqqullugit Naalakkersuisut peqquneqarnissaannik inatsisartunut ilaasortaq Nivi Olsen, Demokraatineersup Inatsisartut aalajangiiffigisassaattut siunnersuutaa Partii Naleraq sinnerlugu imannak oqaaseqarfigissuarput:

Siullermik Nivi Olsen qujanarujussuaq siunnersuummut soqutiginarumik pingaaruteqartorujussuarmillu saqqummiussaqaaravit.

Tassami tamanit ilisimaneqareerpoq meeqqanut inuusuttunullu tunngassuteqartut pillugit annertuumik pisariaqartumillu iliuseqartoqarnissaa pisariaqartinneqartorujussuusut, soorlu aamma taakku pillugit MIO-p nalunaarusiaarisartigaasigut tamakku atuarneqarsinnaasut, minnerunngitsumillu meeqqanut inuusuttunullu suliassaqaarfimmi suliassat amerlassusaat pillugu nassuiaammi ukioq manna saqqummiunneqartumi allaaserineqartut.

Tassanimi nassuiaammi ilaatigut takuneqarsinnaapput nunatsinni meeqqat 24 procentimiit 40 procent-i angullugu isumaginninnikkut suliassaqaarfiusut. Aamma tassani takuneqarsinnaavoq inunnik isumaginninnermi sulisut ataasiakkaarlutik suliassanik agguaqatigiisillugu suliassanik 84-inik suliaqartarput.

Taamaamat taakkunuunaannartigulluunniit takuneqarsinnaavoq meeqqat pisariaqartitsisut inunnik isumaginninnikkut pisariaqartitsinerat qanoq annertutigisoq.

Amma tamanit ilisimaneqareerpoq kommunini inunnik isumaginninnikkut sullissinermi sulisussanik ilinniarsimasunik amingaateqartoqartoq, tassami assersuutigalugu Qaasuitsup kommuniani inunnunik isumaginninnerup iluani atorfiit 55-it inuttassaqaartinneqanngitsut ukioq tusagassiuutitigut nalunaarutigineqarpoq.

Aamma meeqqanut inuusuttunullu suliasaqaarfimmi suliasat amerlassusaat pillugu nassuiaammi ukioq manna saqqummiunneqartumi ilaatigut imannak allaaqasoqarpoq:

“Suliasanik suliarinnittartunit ataasitakkaanit suliasat amerlassusaat 35-it suliarineqarpata, meeqqat inuusuttullu akornanni suliasat 4.634-iusut suliasanik suliarinnittartunik 132-ink pisariaqartitsoqassaaq. Nalunaarsuiffik 1-imi takuneqarsinnaavoq, massakkorpiaq nuna tamakkerlugu meeqqanut inuusuttunulu suliasaqaarfinni suliasanik suliarinnittartut 55-isut. Taamaattumik suliasanik suliarinnittartut 77-it pisariaqassapput suliasat 35-it suliasanik suliarinnittartumik ataatsimit appartinneqassappata. 77-inik suliasanik suliarinnittartunik atorfinitsitsinissap kingunerissavaa ukiumoortumik 27-30 mio. kr. aningaasartuunik qaffaaneq”.

Taakkua saniatigut maannamut nalunngereerparput septemberimut 2014-imut kisitsisit § 37-ikkut Naalakkersuisuniit paasissutississiissutigineqartut naapertorlugit taamanikkumut meeqqat 62-it angerlarsimaffiup avataanut inissinneqarsimasut, taakkunungalugu aningaasartuutit ukiumut 235 mio kr-it missaani annertussuseqartut.

Taamaattumik takuneqarsinnaavoq nassuerutigigalugulu nunatsinni angajoqqaarpasuit meeqqaminnik pitsaasumik perorsaannissaannut ineriartortitsinissaannullu pisariaqartitsineq annertoorejussusoq.

Ullumikkut ajornanngippallaarujussuaqaaq meerarpasuit angerlarsimaffiup avataanut inissiinnarneqartarnerat. Eqqaamaneqartariaqarpoq meeraq pisuussuteqanngitsaq, pillakkatullusoq ilillugu angerlarsimaffimmiik aamma avatangiisinit sungiusimasaminiit qimangutsinneqartarmat. Tamatuma qularnanngilluinnartumik kingunerisarpaa; meeqqap inuunermini innarlerujussuarneqarnera, inuunermi sinnerani puujungisaannangassaa.

Taamaammat isumaqarpugut meeqqat angerlarsimaffiup avataanut inissinneqartarnerat sapinngisamik pinngitsoortinneqartariaqartoq, tassami meeqqap ataatsip angerlarsimaffiup avataanut inissinneqarneranut pisortat qaammammut 80.000 kr-iniik 150.000 kr-it pallillugit

aningaasartuuteqarfigisarpaat, illua-tungaatigulli angajoqqaarsiat akeqanngingajattumik paarsitinneqartarlutik.

Isumaqarpungut pissutsit taamaannerat illua-tungaanut saatinneqartariaqartut. Soormi aamma siusinnerusukkut meeqqat inuusuttullu pillugit inimi maani oqallitarnitsinni, Angajoqqaanut angerlarsimaffimmi ajornartorsiutilinnut “Inuunerup ilinniarfianik” inatsisilerinermik ilinniarsimasunik, inunnik isumaginninnermut tunngasunut siunnersortinik il.il. sulisoqartumik, siunnersuineramik, pikkorissartitsinernik il.il. ingerlatsisinnaasunik pilersitsisariaqartugut ataasiarata oqaatigisaripput.

Taamaammallu inatsisartunut ilaasortap Nivi Olsenip siunnersuutaa tunngaviatigut tamakkiisumik taperserparput. Isumaqarpugulli meeqqat ukiui apeqqutaatinnagit, ilaqtariit pisariaqartitsisut tamarmik ikiorserneqarsinnaanerata aallaaviusariaqartoq.

Taama oqaaseqarluta siunnersuut tunngaviatigut taperserlugu suliap aappassaanneerseqarnissaa ukiamut naalakkersuisut saqqummiussassaannut ilanngullugu, isumaginninnermut peqqissutsimullu ataatsimiititaliami suliarineqarnissaa inassutingaarput.

Anthon Frederiksen